



Su Nuraxi Bruncu Màdugui

Unu de is prus nuraxis antigus de s'ísula

Sa Giara Manna, est a narri sa Giara de Gésturi, famada pruscatotu po is cuaddedus, est unu logu istravanau no isceti po su chi pertocat s'ambienti e sa natura, ma fintzas po s'archeologia. S'agatat prus o mancu a quatre chilómetrus atesu de sa bidda de Gésturi, su Comunu prus a nord de sa Marmidda, chi tenit prus o mancu sa metadi de su territóriu de su parcu, aundi andant medas fidelis po bisitai sa domu de su Biadu Nicola.

Asuba e a is peis de sa pranedda, chi po mori de sa mannària e de is piessignus suos est una fortilesa naturali, ancora oindí s'agatant un'iaxi de rastus de s'antigóriu. In pitzus si contant 24 nuraxis, pruscatotu a una turri isceti, e a is peis ndi ddoi at su dópiu, fraigaus a duas o prus turris; calincunu de custus ddus ant abbitaus finas a su Mesuevu artu: su Bruncu Suérgiu, su Pranu Omus e su Santa Luisa. Rastus de sa preistória povinas prus antigus de s'Edadi Nuràgica funt is perdas fitas e is domus de janas "Sa Uca 'e su pau"; imbecis, testimonias prus modernas funt is biddas púnicu-romanas de Tana e Tupp'e Turri.

Unu de is prus monumentus de importu de s'Edadi Nuràgica, de su Bruncu de Mesu (Séculus XVI - XIV i.C.), est su Cumplessu "Bruncu Màdugui", chi in s'antigóriu fiat su tzentru de su poderi tzivili e religiosu de su logu. Custu monumentu si biiat de atesu meda, cument'e is àterus nuraxis chi

castiànt is chi si narant “iscalas”, est a narri is intradas a sa pranedda.

Est connotu cument'e “Màdugui” (su nómìni de su logu) o “Màduli” (su nómìni archeológicu), e s'artziat in s'oru sud-orientali de sa pranedda. Oindí is murus tenint un'artària de cuatro metrus e mesu, ma in su passau incapas fiant prus artus. Custu monumentu fait a ddu pentzai cument'e su babbu de totus is nuraxis de s'ísula, poita ca is archeólogos ddu considerant su primmu modellu de “proto-nuraxi”, o “nuraxi a corridóriu”: isceti pustis de tempus meda is Nuràgicus ant a cumentzai a fraigai is nuraxis cun is turrìs e cun su tzimbóriu falsu, est a narri sa “tholos”.

Su fràigu, un'istrutura poderosa, est fatu de pedras mannas mannas de basartu, de forma irregulari. Po tempus meda is archeólogos ant datau su Bruncu Màdugui intra su Calcolíticu e su Brunzu Antigu, ma a pustis funt arribbaus a cumprèndi ca est povinas prus antigu.

Sa letura de sa planimetria no est fàtzili a cumprèndi. Su piessignu printzipali est unu passaditzu, unu corridóriu mannu chi atruessat su fràigu in totu sa longària, aundi ddoi at unus cantu innícius in mesu de su muru. S'intrada istrinta de su corridóriu, in sa parti meridionali, aundi ddoi at un'iscala coberta cun rocas una apitzus de s'àtera, sighit in unu passaditzu chi pesat a is duus aposentus de susu, ambaduu circularis, unu a manca e s'àteru in sa parti de fundu, chi su “Sardus Pater” de s'archeològia sarda Giuanni Lilliu iat pentzau chi fiant barracas cobertas cun sa palla. Una teoria prus moderna imbecis narat ca fiant duus aposentus cobertus cun pedras a filera de forma truncu-ogivali. De s'apoyentu de fundu ndi essit un'àteru tretu de corridóriu, in calada, chi andàt a su chi fortzis fiat una segundu intrada.

In prus, in su passaditzu ddoi at unu giassu aundi incapas ddoi iat un'iscala po nci pesai in su terratzu. Su corridóriu e is aposentus funt collegaus de unu bastioni chi tenit un'andamentu còncavu-convessu.

A prus o mancu centu metrus de su nuraxi ddoi funt is rastus de una bidda de barracas, partzidas in dexi bixinaus e duncas acapiadas e fraigadas a ingíriu de is pratzas chi funt in su tzentru. Is aposentus funt circularis e tenint is pomentus impedraus, su foxili, is innícius, is setzidroxus e unas cantu consolas in is murus. Aintru, ddoi ant agatau materialis chi iscóviant ca is



apoyentus ddus usànt po fai cosas diversas s'unu de s'àteru: po aprontai e coxinai, po trabballai is

materialis, po arreguai cosa o po nci iscavulai su chi no serbiat prus.

De is repertus chi ant agatau, is archeológus ant cumpréndiu chi sa bidda est nàscia a pustis de su proto-nuraxi, in su Brunzu Finali (Séculus XIV-X i.C.). Is murus de sa bidda ddus ant isciusciaus e torraus a fai unas cantu bortas, cosa chi fait a cumpréndi ca sa sociedadadi de insaras fiat bia e mudàt sémpiri.

SA MARMIDDA CHISTIONAT IN SARDU - Progetu finantziau cun su dinai de sa Regione Autònoma de Sardigna cunforma a sa L. 482/99 e a sa L.R. 22/2018.